

Museum Sursilvan Cuort Ligia Grischa Trun, nova edizium:

Alois Carigiet – In mied d'instrucziun per la 4.-6. classa

Il Museum Sursilvan Cuort Ligia Grischa a Trun posseda la pli gronda collecziun publica dad ovas d'art dad Alois Carigiet. Denter auter anflan ins leu ils dessegns originals da quater da ses cudischs da maletgs ed autras ovas da differents geners. Ina gronda part dalla collecziun deriva dalla donaziun da Walter e Gertrud Gartmann-Köppel la quala il museum ha retschiert igl onn 2019. Digl onn 2020 entochen 2022 muossa il Museum Sursilvan Cuort Ligia Grischa duas exposiziuns cun ovas digl artist indigen ed il Cabinet Carigiet. En connex cun quellas exposiziuns cumpara ussa in mied d'instrucziun tier igl artist indigen.

Cul mied d'instrucziun *Alois Carigiet – In mied d'instrucziun per la 4.-6. classa* screts dall'intermediatura d'art Alexa Giger s'occupeschan las scolaras ed ils scolars dalla 4. tochen 6. classa cugl artist Alois Carigiet e cun ina part da sia ovra. Entras mirar e cun formar activamein emprendan els d'enconuscher igl artist e sia ovra.

L'unitad d'instrucziun entscheiva cun ina lavur preparativa. Las scolaras ed ils scolars serendan sils fastitgs digl artist, senza enconuschientschas preliminaras e senza relaziun tier el. Els fan quei sco el, cun observar e documentar cun maletgs igl agen contuorn.

L'introducziun ella confruntaziun concreta cun Alois Carigiet e sia ovra succeda suenter sin fundament dils cudischs da maletgs enconuschents dad Alois Carigiet e meina cun exerchezis da contemplar maletgs tier ils differents geners ell'ovra digl artist. Ella biografia da Carigiet vesan ins, tgei temas e domicils ch'ei stai impurtonts en tgei fasa da sia veta. L'occupaziun intensiva cull'ovra dils Treis Retgs porscha la pusseivladad allas scolaras ed als scolars da perscrutar quei motiv pli profundamein, da sviluppar atgnas ideas per maletgs e da realisar quellas entras art creativ. Sco finiziun suondan informaziuns per la viseta culla classa el museum.

Il mied d'instrucziun porscha bia material illustrativ, datotecas da tun e film sco era instrucziuns pigl art figurativ. El commentari per las personas d'instrucziun vegnan las singulas lecziuns entruidadas detagliadamein. Quel cuntegn era informaziuns, explicaziuns, incumbensas, lincs nizeivels ed ideas cuntinuontas. Suenter suonda il material illustrativ (I) ed il material illustrativ digital (D) per visualisar las ovas dad Alois Carigiet sco era ils models da copiar (M) cun las incumbensas per las scolaras ed ils scolars.

Las ovas d'art che vegnan tractadas ell'unitad d'instrucziun derivan principalmein dil legat Walter e Gertrud Gartmann-Köppel ch'ei en possess dil Museum Sursilvan Cuort Ligia Grischa a Trun. Ulteriuras ovas s'audan tier la collecziun dil Museum d'art dil Grischun Cuera ni ein en possess privat.

Il mied d'instrucziun cumpara en lungatg tudestg e romontsch sursilvan e sa vegnir retratg tier il Museum Sursilvan Cuort Ligia Grischa Trun www.museum-trun.ch/experimentar.